

Oiartzungo Ikastolan, aita Sebastian Mendibururen II. Mendeurrena ospatuz egin du Euskaltzaindiak bere batzarra, 1982.eko Uztailaren 17an. Bildu dira L. Villasantate buru, J. Haritschelhar buruorde, P. Altuna, J. L. Davant, A. Irigoyen, P. Lafitte, E. Larre, L. Mitxelena, F. Ondarra, J. San Martin, J. M.^a Satrustegi eta A. Zavala euskaltzain jaunak; J. L. Lizundia idazkari-ordea batzarrean aurkitzen da eta X. Kintana euskaltzain urgazlea ere bai, Merkatalgo Izendegiko partean; J. M.^a Satrustegi idazkari delarik.

X. Diharce, J. Hiriart-Urruty eta P. Larzabal jaunek beren ezin etorria adierazi dute.

Ohi den otoitzarekin, arratsaldeko bostetan hasi da batzarra.

I. *Irakaslego batzordea*. Eguneko gaietan lehen pundua Irakaslego batzordearen egoera berria ikustea izan da. Eusko Jaurlaritzak Euskararen Gaitasun agiria emateko eskubidea berak duelarik, batzorde honen lana asko mugatu eta ttipitu da. Hala ere Nafarroa eta Iparraldeko arazoak hortik kanpo gelditzen direlarik, batzorde honi nolabaiteko jarraipena ematea komeni dela ikusi da.

A. Irigoyen jaunak adierazi du, gai hau eta izendapen batzu orain baino lehen ere Euskaltzaindiak erabili omen dituela, eta berak ez dituela inongo agirietan jasorik aurkitu. Zuzendaritzak aztertzen dituen puntuak ez direla agirietan sartzen, erantzun zaio, Batzarrari aurkeztu behar bait dizkio. Izen horiek Batzarrari aurkezteko, hain zuzen ere, lehenengo Irakaslego batzordekide guzietan gutun bana bidali zaiela esan da, batzordean jarraitu nahi duten galdetuz. Hau da, beraz, erabakiak hartzeko unea eta ez besteak.

Nafarroan Ekainean egindako azterketen berri eman da gero. Haritschelhar jaunak, beste alde, Iparraldeko egoerari buruz, han Euskararen tituluak Unibertsitateak emango dituela esan du.

Iritziak bateratuz, Irakaslego batzordea datorren Apirila arte behintzat dagoen dagoenean uztea erabaki da.

II. *Merkatalgo Hiztegia*. Izendegi honen birrargitalpena dela eta lan proposamenari egindako oharrak jaso dira. Gehigarri eta aldaketak banan-banaka ikusteko batzordeñoa izendatu da, A. Irigaray, A. Irigoyen, L. Mitxelena, K. Rotaetxe eta X. Kintana bera barne direla. Birrargitalpen hau, gaur ikusi denez, Bilboko Merkatalgo Ganbarak bere bezeroentzat egingo omen du, eta ez Euskal Herri guzira Euskaltzaindiak ohi duen eran. Zabalkunde mugatua izango du beraz.

III. *Euskararen egoerari buruzko adierazpena.* Azkenaldi honetan gertatzen ari diren lege-mugaketa eta eztabaidak kontuan izanik, euskararen etorkizunari buruz izan ditzaketen ondoreak sumatzen dira eta adierazpen bat argitaratzea komenigarri izango dela, esan da. Nafarroan, esate baterako, etorkizun oso beltza ikusten da gure hizkuntzarentzat, gaur euskara mintzo den lurraldeetara mugatuz legeak dioen ofizialtasuna, eskoletan euskara bazterturik dagoela han ere jakinik. J. L. Lizundiak egin daitekeenaren zirriborro bat zabaldu du, eta iritzi guziak luze eta zabal eztabaidatu ondorean, eranskintzat ematen den adierazpena onartu da.

Eta besterik gabe amaitu da hileroko batzarra.

* * *

Gorazarreko batzar irekia

Arratsaldeko 6 t'erdietan eta hileroko batzarraren ondoren, hasten da Ikastolako Batzar Aretoan aita Sebastian Mendibururen II. mendeurrena dela eta gorazarreko batzar irekia. Goian aipaturikoeekin batera, E. Agirretxe, J. A. Arana, J. M.^a Aranalde, X. Aranburu, M. Atxaga, P. Charritton, J. Estornes Lasa, J. Garmendia, J. Goikoetxea Maiza, J. M.^a Lekuona, I. Sarasola, M. Ugalde eta J. J. Zearreta euskaltzain urgazle jaunak ere biltzen dira batzar honetan.

Lehendabizi, Mitxelena eta Lizaso bertsolariak saio labur-labur bat eskaintzen dute.

Ondoren, Iñaki Irigoyen alkate jaunak Oiartzungo herriaren izenean, agur hitz batzu irakurtzen ditu; A. Luis Villasantek euskaltzainburu bezala, era berean eginaz.

Gorazarre txostenak: D. Manuel Lekuona euskaltzain jaunak "A. Mendibururen *Jesusen Bihotzaren Devocioa* irakurtzen" gaiaz egiten du; Luis Mitxelena euskaltzain jaunak "Mendibururen hizkeraz hitz bi", izenekoaz eta Patxi Altuna euskaltzain jaunak "Mendibururen idazlan argitaragabeak", deitutakoaz.

Idazkaria
J. M.^a Satrustegi

Euskaltzainburua
Fr. Luis Villasante